



Til adressatar i følge liste

Saksbehandlar, innvalstelefon

Tom Dybwad, 5764 3123

Stemnebøskogen naturreservat - Fylkesmannen tilrår å opprette naturreservatet i medhald av naturmangfaldlova etter prosedyren for frivillig vern

Fylkesmannen tilrår å opprette Stemnebøskogen naturreservat på Hisarøyna i Gulen kommune i medhald av naturmangfaldlova etter prosedyren for frivillig skogvern.

Vi viser til vårt brev av 12.09.2019 med framlegg om å opprette Stemnebøskogen naturreservat på Hisarøyna i Gulen kommune, i medhald av naturmangfaldlova etter prosedyren for frivillig skogvern.

Bakgrunn

Sidan St.meld. 25 (2002-2003) har frivillig vern, saman med vern på statsgrunn, vore ein av hovudstrategiane for nytt vern av skog i Noreg. Frivillig vern inneber at det er grunneigarane, i samarbeid med skogeigarlaget, som tilbyr staten areal for mogleg vern. Dersom verneverdiane er så store at miljøvernstyresmaktene finn det interessant, vert det så starta forhandlingar mellom staten og grunneigarane. Det vert då forhandla både om avgrensing, verneforskrift og pris, og det vert ikkje inngått avtale om vern med mindre partane vert samde.

Områdevern er likevel ikkje berre ei sak mellom grunneigarar og miljøstyresmakter. Som for tradisjonelle verneprosessar er det difor viktig med ei offentleg høyring der også andre instansar og samfunnsinteresser kan kome med merknader. Naturmangfaldlova §§ 41 og 42 krev også at alle som vernet vedkjem vert informerte når vernearbeidet tek til, slik at dei i god tid før høyringa er best mogleg informerte om korleis det planlagde verneområdet vil kunne gripe inn i deira interesser. Dette er ikkje mindre viktig ved frivillig vern, der forhandlingane med grunneigarane allereie har kome langt når den formelle delen av prosessen startar opp.



Fylkesmannen sende oppstartmelding om frivillig vern i eit brev av 12.03.2019. Området vart då kalla Hisarøyna søraust. Etter oppstartmeldinga kom ein grunneigar til med tilbod om frivillig skogvern, og Språkrådet tilrådde at ein brukte eit anna namn, t.d. Stemnebøskogen, eit namn som også grunneigarane var samde i. Framlegget om å opprette Stemnebøskogen naturreservat vart send på høyring 12.09.2019 med frist til 15.11.2019 for å kome med fråsegn.

Aktuelt verneområde

Framlegget til naturreservat (sjå vedlagt kart) ligg søraust på Hisarøyna mot Folefotsundet i Gulen kommune. Grunneigarane i området har underskrive avtale om vern som naturreservat.

Det planlagde verneområdet omfattar i alt ca. 1365 dekar og består av teigar som høyrer til gnr./bnr. 113/1, 113/2, 113/3, 113/4 og 113/5.

Verneverdiar i området

Framlegget gjeld eit skogområde som vart kartlagt og funne med store naturverdiar i 2013 og vidare sørover. Framlegget gjeld eit større areal enn kjerneområdet med A-verdi (svært viktig). Tidlegare er tilbodsområdet kartlagt som kystfuruskog med A-verdi, men ved kartlegginga i 2013 valde ein å fokusere på regnskogen, og med det eit mindre avgrensa område. Det er svært verdfullt at eit så stort samanhengande område med skog på kysten vert verna som naturreservat.

Skildringa under gjeld kjerneområdet (i alt ca. 283 dekar) som vart funne som svært viktig (A-verdi) i 2013 og er omtala i Naturbasen. Heile kjerneområdet ligg inne i framlegget til naturreservat.

«Verdibegrunnelse

Lokaliteten er uvanleg stor (271 daa) og får høg vekt på storleik. Det same gjeld for artsmangfald og det er også på grensa mellom middels og høg vekt for bergvegger og skogtilstand. Samla sett er verdien ein klar svært viktig - A

Innledning

Skildringa er utarbeidd av Geir Gaarder i Miljøfaglig Utredning 18.02.2014, med grunnlag i eige feltarbeid 11.09.2013 saman med Hans H. Blom (Institutt for Skog og Landskap). Kartlegginga vart gjort i samband med ARKO-prosjektet på oseaniske skogar på Vestlandet. Lokaliteten har også tidlegare vore registrert og lagt inn i Naturbase, men da med svært tynn omtale (det stod omtrent berre at dette var einaste kystfuruskogen ute på øyane her) basert på Gaarder (2005) som i sin tur baserer seg på Eilertsen (2004). Heile omtalen er no skriven om, naturtype endra, verdi auka og avgrensinga er også ein god del endra.

Beliggenhet og naturgrunnlag

Lokaliteten ligg på nordaustsida av Stemnebøfjellet på søraustre del av Hisarøyna. Mot nord ligg det to bratte kløfter med innslag av ein del bergveggar. Mot aust går også ei kløft, men noko meir open og ikkje så bratt. Litt bergveggar finst også her. Berggrunnen verker ikkje å vere særleg kalkrik. Det er ein liten bekk i den austvendte kløfta, berre nokre små vassig i den vestre i nord. Det er også litt blokkmark. Lokaliteten grenser for det meste litt gradvis mot tørrare og meir eksponert skog på alle kantar. Mot nordvest er det i praksis ei gradvis grense mot attgroande kystlynghei. Ein kunne ha skilt ut dei nordlege kløftene som ein lokalitet av litt lågare verdi, og den austvendte kløfta som ein annan av høg verdi, men under tvil er det her valt å slå dei saman.

Naturtyper og utforminger

Småbregneskog er nok samla sett kanskje vanlegaste naturgrunntype her, men det er også ein god del blåbærskog (særleg i aust) og dels også innslag av storbregneskog. Bergveggane verkar gjennomgåande ganske kalkfattige. Som verdifull naturtype er det klart at regnskog er rett kategori og det meste av feltsjiktet og øvrige artar tilseier at det er den fattige deltypen som er gjeldande her, og i liten grad den rike.

Artsmangfold

Bjørk er samla sett vanlegaste treslag og dominerande i dei nordvendte kløftene. I tillegg er det ein god del furu, som stadvis er dominerande i søraust. I tillegg førekjem rogn og osp meir sparsamt (til dels ein del rogn i nord). Også førekomst av selje og



gråor. Feltsjiktet er ikkje spesielt rikt, men m.a. veks det litt hinnebregne og raggtelg både i nord og aust. Derimot er førekomsten av regnskogstilknytt lav og mosar uvanleg god, og med unntak av Svanøy i Flora kan dette vere den beste lokaliteten for fattig boreonemoral regnskog nord for midtre delar av Hordaland. Av mosar så finst det spreidd med småhinnemose i den austvendte kløfta. Elles litt grannkrekemose (særleg i nord) og m.a. storstylte, raudmuslingmose og småstylte. Av lav vart det gjort fleire funn av skoddelav (NT) i området, og i nordvest også av kystkorallav (NT). Kystvortelav (VU) vaks på ein handfull rognetre i nord. I tillegg vart truleg grå buktrinslav (VU) funne to stader i aust, i så tilfelle einaste lokalitet saman med Svanøy nord for Os i Hordaland. Også av kyststry-gruppa vart det gjort usikre funn i området. Til sist kjem kort trollskjegg (NT), som vaks sparsamt ein stad i nord på ein bergvegg og to stader i aust. For øvrig ein del m.a. av gammalgranlav og litt kättefotlav samt funn av skrukkelav i aust. Det er potensial for fleire kravfulle og dels raudlista artar her.

Påvirkning

Skogen er for det meste i aldersfase, med overgang mot eldre optimalfase i nordvest. Til dels er det overraskande høgvaksten og grov furuskog her, særleg i det austvendte dalføre. Her er det også sparsamt med daudt trevirke, inkludert gadd. Ein del algebelegg på lauvtree, særleg i nord. Det vart funne rest av ei gammal løypestreng i aust.

Fremmede arter

Ingen observert innanfor lokaliteten.

Landskap

Slik skog verkar sjeldsynt i distriktet og det er som før nemnt truleg langt til tilsvarande miljø.

Areal frå kartobjekt (daa)

283,8»

Status i kommuneplanen

I gjeldande kommuneplan for Gulen er området LNF-område (landbruks-, natur- og friluftsområde).

Verneforskrift og grenser

Ved oppretting av eit naturreservat vert det utarbeidd særskilde verneforskrifter som fortel kva for restriksjonar som vert lagde på aktivitetar i området. Dersom det vert oppretta naturreservat, vil det bli forbod mot tekniske inngrep, hogst og motorferdsel. Beite, vanleg friluftsliv, fiske og vanlegvis også jakt, vil vere lov. For Stemnebøskogen har det vore naturleg å ta utgangspunkt i standard mal for skogområde som blir verna som naturreservat. Grunneigarane sine innspel er tekne inn så langt det har late seg gjere. Framlegget til verneforskrift er lagt ved dette brevet. Eigedomstilhøva vert ikkje endra ved oppretting av naturreservat. Kartet som er lagt ved, viser framlegget til naturreservat, og kan fram til vedtak berre innskrenkast. Framlegget til verneforskrift kan berre gjerast mindre streng.

Erstatning

Etter § 50 i naturmangfaldlova har eigar eller rettshavar i område som vert verna som naturreservat rett til erstatning for økonomisk tap når vernet gjer noverande bruk vanskeleg. Ved frivillig vern følgjer ein derimot ikkje den ordinære framgangsmåten ved fastsetjing av erstatning som er omtalt i § 51. Frivillig vern er basert på at partane har vorte samde, også om erstatninga. Difor kan erstatningssummane utbetalast så snart området er verna, utan å vente på dei fristane som er omtalte i § 51.



Eigedomstilhøve

Eigarar av området med framlegg om oppretting av naturreservat er gnr./bnr. 113/1, 113/2, 113/3, 113/4 og 113/5.

Namn

Namn på verneområdet er ein del av verneplanprosessen med høve til å kome med innspel og framlegg. Fylkesmannen har i samråd med grunneigarane og i tråd med Språkrådet kome fram til namnet *Stemnebøskogen naturreservat*.

Konsekvensar av vernet

For å ta vare på dei sårbare og store naturkvalitetane i området er det nødvendig med ei verneform som sikrar området mot inngrep. Det er difor ønskjeleg å verne om områda som naturreservat etter naturmangfaldlova § 37. Ei slik verneform vil i utgangspunktet forby aktivitetar og nye anlegg som kan skade verneverdiane i naturreservatet. Vernet vil føre til visse restriksjonar på bruk av området, både når det gjeld hogst og andre inngrep. Grunneigarane vil framleis ha rett til jakt og fiske og ålmenta generelt for sanking av sopp og bær. Turstiar som er i området skal også kunne haldast ved like. Dersom det går kraftlinjer gjennom områda skal dei kunna driftast, vedlikehaldast og oppgraderast.

Brukarinteresser

Fylkesmannen er ikkje kjend med at det er spesielle brukarinteresser i området utanom grunneigarane sine jaktinteresser og behov for å kunne fortøye i land når ein kjem med båt. BKK Nett AS sitt behov for å vedlikehalde ei kraftlinje heilt sør i området, har gjort at vi i samråd med grunneigar etter oppstartmeldinga har vald å ta kraftlinja og eit mindre areal ut av naturreservatet.

Innspel til oppstartmeldinga

Det kom følgjande innspel til oppstartmeldinga:

Statnett melder at BKK si 24 kV leidning som går gjennom det foreslåtte verneområdet ved Bardsvika lengst sør, og ber om at dei kjem på høyringslista.

BKK Nett ber om at verneforskrifta vert utforma slik at BKK Nett vert sikra rett til drift, vedlikehald og fornying av eksisterande nettanlegg, både luftleidning og sjøkabel med ilandføring. Langs luftleidninga må det og kunne utførast naudsynt hogst for sikker og forskriftsmessig drift (skoggate med breidde 16 meter). Det er viktig å kunne gjennomføre slikt arbeid utan søknad fordi slikt arbeid ofte hastar.

Norges vassdrags- og energidirektorat – NVE viser til at den sørlege delen av området vert kryssa av ein 24 kV kraftlinje som tilhøyrer BKK Nett, jf Statnett si uttale. NVE ber om at vernegrensa vert flytta nord for kraftlinja, jf framlegget til nasjonal ramme for vindkraft på land. NVE viser også til at vern i området kan kome i konflikt med framtidig vindkraftutbygging, sjølv om sjølve området ligg i bratt terreng som vert vurdert som lite aktuelt for vindkraftutbygging. Men framtidig vindkraftutbygging i nærliggjande område kan krevje naturinngrep i form av t.d. ny infrastruktur, og kjem med framlegg om å



inkludere potensiell vindkraftutbygging saman med naudsynt motorferdsel under spesielle dispensasjonsheimlar i § 7.

Riksantikvaren viser til kulturminneforvaltninga i fylkeskommunen og handsamar difor ikkje saka.

Alf Hals (grunneigar 113/1 og 2) kjem med framlegg om *Kongshammen naturreservat* eller *Stemnebøskogen naturreservat* som namn.

Språkrådet skriv at det er ikkje tilrådeleg å bruke *Hisarøyna søraust naturreservat* som namn på verneområdet. Namnet må eventuelt skrivast *Søraustre Hisarøyna naturreservat*. Den alternative namneforma *Kongshammen naturreservat* verkar fullt ut tilrådeleg.

Forsvarsbygg finn at Forsvaret sine interesser er tilstrekkeleg ivaretekne av i verneforskrifta som var vedlagt oppstartmeldinga, og dei har såleis ingen merknader.

Direktoratet for mineralforvaltning skriv at i følgje kartdatabasane frå Norges geologiske undersøking(NGU), er det ikkje registrert viktige mineralressursar innanfor verneområde. DMF har derfor ingen merknader til forslaget om oppretting av naturreservatet.

Statens vegvesen region vest har ingen merknader.

Anita Stevnebø og Leiv Ingmar Kaale (grunneigar for gnr/bnr 113/3, ikkje med i oppstartmeldinga) har etter oppstartmeldinga kome med tilbod om vern av deira teig som ligg mellom det nordlege og sørlege området som låg inne i oppstartmeldinga av 12.03.2019. Dei bad vidare om at ringbarking og fjerning av gran vert tillate, at småbåtar kan fortøyast, at dei faste bålplassane ved faste kvile/jaktplassar ved Mosemyra og Storevikneset kan nyttast, og at stiar kan ryddast for velta tre. Dei meinte at *Stemnebøskogen* er eit namn som vil vere dekkjande for heile området.

Fylkesmannen innarbeidde med eitt unntak alle innspela til oppstartmeldinga i framlegget som vart sende på høyring. Utvidingstilbodet frå Anita Stevnebø og Leiv Ingmar Kaale på gnr/bnr 113/3 medførde at framlegget som vart sendt på høyring vart utvida og utgjer eitt samanhengande natur- og skogområde. NVE si tilvising til at delar av området låg i utkanten av Nasjonal vindkraftplan vart ikkje innarbeidd av Fylkesmannen, fordi naturverdiane er store og området låg heilt i utkanten av vindkraftområdet. Etter dette vart Nasjonal vindkraftplan lagt til sides av Regjeringa og er difor ikkje lenger aktuell.

Fråsegner til framlegget på høyring

Språkrådet skriv i si fråsegn at «så langt vi kan sjå, er det tilrådeleg å nytte *Stemnebøskogen naturreservat* som namn på det aktuelle verneområdet. Det er opplyst i saksdokumenta at heile naturreservatet ligg innanfor grensene til garden Stemnebø, gnr. 113 i Gulen kommune. I SSR er *Stemnebø* registrert som ei tilrådd gardsnamnform.»



Forsvarsbygg skriv at «det aktuelle verneområdet, Stemneskogen er same område som Hisarøyna naturreservat som var sendt på høyring 12.03.2019, men med ei utviding. Det var i forbindelse med høyring av verneforslaget for Hisarøyna naturreservat presentert egne verneforskrifter. Av verneforskriftene fant Forsvarsbygg at Forsvarets interesser var tilstrekkelig ivaretekne. Vi antek at dei same verneforskriftane gjeld for det utvida verneområdet. Forsvarsbygg har såleis ingen ytterlegare merknader til verneforslaget.»

Norges vassdrags- og energidirektorat – NVE skriv at «NVE hadde to merknader i vår uttalelse til oppstartsmeldingen, vedrørende kraftnett og Nasjonal ramme for vindkraft. Regjeringen har skrinlagt Nasjonal ramme for vindkraft, så denne merknaden kan ses bort ifra. Når det gjelder kraftnett, har Fylkesmannen flyttet vernegrensen etter innspill fra BKK Nett og NVE. BKK ba om 16 meter ryddegate. Vi ber Fylkesmannen bekrefte at avstanden til linjen tilfredsstiller dette kravet. Hvis ikke det er tilfelle ber vi tilsvarende bestemmelse i verneforskriftens § 4 som vi ba om i vår uttalelse til oppstartsmeldingen.»

Fylkesmannen har teke omsyn til dei innkomne merknadene. Grensa mot kraftlinja i søraust er lagt 8,5 meter frå linja (dvs. tilsvarende 17 meter ryddegate), noko som vart gjort før framlegget vart sendt på høyring.

Grenser og verneforskrift

Det er ikkje kome framlegg om å endre grensene eller verneforskrifta for naturreservatet etter at framlegget vart sendt på høyring.

Fylkesmannen tilrår at Stemnebøskogen får dei same grensene og verneforskrift som vart nytta i framlegget på høyring.

Saksgang vidare

Dette er Fylkesmannen si tilråding til Miljødirektoratet. Miljødirektoratet vil gå gjennom Fylkesmannen si tilråding og alle saksdokument før direktoratet sender si tilråding til Klima- og miljødepartementet, som legg planen fram til endeleg avgjerd i regjeringa (Kgl.res.), truleg i juni 2020.

Adresselister

Kopi av dette brevet vert sendt til grunneigarane, Gulen kommune og alle som har kome med innspel eller fråsegn med merknader i verneprosessen

Informasjon

Spørsmål om planarbeidet kan rettast til

- seniorrådgivar Tom Dybwad, tlf. 57 64 31 23, e-post fmsftd@fylkesmannen.no



Skriftlege innspel kan sendast til

Fylkesmannen i Vestland, Njøsavegen 2, 6863 Leikanger eller på e-post
fmvlp@fylkesmannen.no

Med venleg helsing

Kjell Kvingedal
miljødirektør

Eline Orheim
seksjonsleiar

Dokumentet er elektronisk godkjent

Vedlegg:

- Kart over framlegg til Stemnebøskogen naturreservat, Gulen kommune
- Framlegg til verneforskrift for Stemnebøskogen naturreservat

Adresseliste kopi:

Peder Hausevik

Norges vassdrags- og energidirektorat - NVE

Gulen kommune

Forsvarsbygg

Miljødirektoratet

Språkrådet - Stadnamntenesta på Vestlandet

BKK Nett AS

Alf Hals


May-Sissel Hessen

Liv Ingmar Kaale og Anita Stevnebø

Statnett



Vedlegg: Kart over framlegg til Stenkebøskogen naturreservat





Vedlegg: Framlegg til verneforskrift for Stemnebøskogen naturreservat

Forskrift om vern av Stemnebøskogen naturreservat, Gulen kommune, Sogn og Fjordane

Fastsett ved kongeleg resolusjon xx.xx.2020 med heimel i lov 19. juni 2009 nr. 100 om forvaltning av naturens mangfald (naturmangfaldlova) § 34 jf. § 37 og § 62. Fremja av Klima- og miljødepartementet.

§ 1. (føremål)

Føremålet med naturreservatet er å verne eit av dei få store og lite påverka skogområda på kysten som er att i Vest-Noreg, med sitt biologiske og geologiske mangfald. Området er viktig for biologisk mangfald ved at den gamle kystfuruskogen her inneheld fleire skogs- og vegetasjonstypar, med ei kjerne av bjørkedominert boreonemoral regnskog med svært rike førekomstar av sjeldne, regnskogstilknytta lav og mosar.

Det er ei målsetjing å ta vare på verneverdiane i mest mogleg urörd tilstand, med stadeigne artar og naturtypar og naturleg skogdynamikk, og eventuelt vidareutvikle dei.

§ 2. (geografisk avgrensing)

Naturreservatet vedkjem følgjande gnr./bnr.:

Gulen kommune: 113/1, 113/2, 113/3, 113/4, 113/5

Naturreservatet dekkjer eit totalareal på ca. 1365 dekar. Grensene for naturreservatet går fram av kart datert Klima- og miljødepartementet xx.xx.2020. Dei nøyaktige grensene for naturreservatet skal merkast i marka. Knekkpunkta skal koordinatfestast.

Verneforskrifta med kart vert oppbevart i Gulen kommune, hos Fylkesmannen i Vestland, i Miljødirektoratet og i Klima- og miljødepartementet.

§ 3. (vernereglar)

I naturreservatet må ingen gjere noko som skadar verneverdiane som går fram av føremålet med vernet.

I naturreservatet gjeld følgjande vernereglar:

- a) Vegetasjonen, medrekna daude buskar og tre, er verna mot skade og øydelegging. Det er forbode å fjerne planter og sopp inkludert lav eller deler av disse frå naturreservatet. Planting eller såing av tre og annan vegetasjon er forbode.
- b) Dyrelivet, medrekna reirplassar og hiområde, er verna mot skade, øydelegging og unødige forstyrring. Utsetting av dyr er forbode.
- c) Det må ikkje settast i gong tiltak som kan endre naturmiljøet, som f.eks. oppføring av bygningar, anlegg, gjerder, andre varige eller mellombelse innretningar, parkering av campingvogner, brakker e.l., opplag av båtar, framføring av luftleidningar, jordkablar, kloakkleidningar, bygging av veger, drenering eller anna form for tørrlegging, uttak, oppfylling eller lagring av masse, utføring av kloakk eller anna konsentrert ureining, etterlating av avfall, gjødsling, kalking eller bruk av kjemiske plantevern- eller skadedyrmiddel. Forsøpling er forbode. Opplistinga av tiltak er ikkje uttømande.
- d) Bruk av naturreservatet til større arrangement er forbode.
- e) Bålbrenning er forbode.

§ 4. (generelle unntak frå vernereglane)

Vernereglane i § 3 andre ledd er ikkje til hinder for:

- a) Beiting
- b) Sanking av bær og matsopp.
- c) Jakt og fangst i samsvar med gjeldande lovverk.
- d) Oppsetting av mellombelse, mobile jakttårn for storviltjakt.
- e) Rydding av skotfelt ved jaktpostar slik at feltet er fritt for vegetasjon etter retningslinjer i forvaltningsplan
- f) Felling av store rovdyr i samsvar med gjeldande lovverk.



- g) Utplassering av saltstein for husdyr og storvilt.
- h) Vedlikehold av eksisterande bygningar, gapahukar, jakttårn, stiar, bruer og andre anlegg og innretningar, i samsvar med tilstand på vernetidspunktet.
- i) Rydding av eksisterande stiar for ferdsel og sanking av beitedyr etter retningslinjer i forvaltningsplan slik at dei kan haldast opne etter vindfall og liknande.
- j) Fortøyning av småbåt ved fastfortøyning, dragfortøyning og ankring.
- k) Ringbarking og felling av gran i medhald av forvaltningsplan.
- l) Bålbrenning med tørrkvist frå bakken eller medbragt ved i samsvar med gjeldande lovverk.

§ 5. (regulering av ferdsel)

All ferdsel skal skje varsamt og ta omsyn til vegetasjon, dyreliv og kulturminne.

I naturreservatet gjeld følgjande reglar om ferdsel:

- a) Motorferdsel på land og i vatn er forbode, medrekna landing og start med luftfartøy.
- b) Utanom eksisterande vegar og stiar vist på vernekartet, er bruk av sykkel, hest og kjerre, og riding forbode.

§ 6. (generelle unntak frå ferdselsreglane)

Ferdselsreglane i § 5 er ikkje til hinder for gjennomføring av militær operativ verksemd og tiltak i samband med ambulanse-, politi-, brannvern-, rednings- og oppsynsaugemed, og gjennomføring av skjøtsels- og forvaltningsoppgåver som er bestemt av forvaltningsstyresmakta. Unntaket gjelder ikkje øvingsverksemd.

Ferdselsreglane i § 5 andre ledd er ikkje til hinder for:

- a) Naudsynt motorferdsel i samband med uttransport av sjuke og skadde bufe. Køyretøy som vert nytta skal være skånsamt mot markoverflata. Det skal gjevast melding til ansvarleg oppsyn for verneområdet i forkant av køyring.
- b) Naudsynt uttransport av felt elg, hjort og bjørn med lett beltekøyretøy som ikkje set varige spor i terrenget, og med traktor eller lett terrengkøyretøy på eksisterande traktorvegar vist på vernekartet.
- c) Landing og start med Forsvaret sine luftfartøy.

§ 7. (spesifiserte dispensasjonsreglar)

Forvaltningsstyresmakta kan etter søknad gi dispensasjon til:

- a) Tiltak i samband med forvaltning av vilt og fisk.
- b) Istandsetjing av bygningar, steinmurar, bruer og andre kulturminne etter samråd med kulturminnestyresmaktene.
- c) Bygging av nye klopper til erstatning for gamle.
- d) Oppsetting av nye fleirårige gapahukar og jakttårn dersom viltet (hjortedyr) endrar trekk.
- e) Naudsynt motorisert transport av ved, material og utstyr til hytter innanfor verneområdet.
- f) Naudsynt motorferdsel for å fjerne gran felt i samsvar med § 4 l.
- g) Gjenoppføring av bygningar, anlegg eller innretningar som er gått tapt ved brann eller naturskade, og naudsynt motorferdsel for dette.
- h) Merking og rydding av nye stiar og oppsetting av turpostar.
- i) Tilretteleggingstiltak på eksisterande stiar.
- j) Bruk av naturreservatet i miljøtilpassa reiselivsverksemd etter plan godkjend av forvaltningsstyresmakta.
- k) Naudsynt motorferdsel i samband med aktivitetar nemnd i § 4 g, h og l, og § 7 a, b, c og i.

§ 8. (generelle dispensasjonsreglar)

Forvaltningsstyresmakta kan gjere unntak frå forskrifta dersom det ikkje strir mot føremålet med vernevedtaket og ikkje kan påverke verneverdiane nemneverdig, eller dersom omsyn til tryggleik eller omsynet til vesentlege samfunnsinteresser gjer det naudsynt, jf. naturmangfaldlova § 48.



§ 9. (skjøtsel)

Forvaltningsstyresmakta, eller den forvaltningsstyresmakta bestemmer, kan setje i verk tiltak for å oppretthalde eller oppnå den natur- eller kulturtilstanden som er føremålet med vernet, jf. naturmangfaldlova § 47.

§ 10. (forvaltningsplan)

Det kan utarbeidast forvaltningsplan med nærare retningslinjer for forvaltning av naturreservatet. Forvaltningsplanen kan innehalde nærare retningslinjer for gjennomføring av skjøtsel.

§ 11. (forvaltningsstyresmakt)

Miljødirektoratet fastset kven som skal vere forvaltningsstyresmakt etter denne forskrifta.

§ 12. (ikrafttreding)

Denne forskrifta trer i kraft straks.

Med helsing

medunderskrift
stilling

Tom Dybwad
seniorrådgjevar

Dokumentet er elektronisk godkjent